

四庫全書

史部

欽定四庫全書

史部

平定準噶爾方略前編卷三十六至四十一

詳校官監察御史臣孫家賢

通政使司副使臣莫瞻菴覆勘

總校官進士臣朱鈐

校對官中書臣李斯咏

謄錄監生臣李亭植

欽定四庫全書

平定準噶爾方略前編卷三十六

雍正十二年秋七月丁丑

命籌拒賊及撤兵事宜

上諭辦理軍機大臣等白爾等行文平郡王賊人如犯
軍營令我兵酌量拒敵若目前無事仍撤回科卜多
擇形勝處駐劄休養馬匹其哨探兵丁俱著撤回如
有應設之處務揀選幹員防守

戊寅

命選直隸等四省綠旗兵赴北路軍營更代

上諭辦理軍機大臣等曰從前直隸山東山西河南四省派往北路出征之綠旗兵丁在外已經數年應另派兵丁前往更換著四省督撫提督每省選派精兵一千名一切衣裝等項於存公銀兩內動支應用豫備齊全候諭旨到日起程

癸巳

命王公滿漢文武大臣等會議軍務

上諭辦理軍機大臣等曰西北兩路用兵已經數年將士効力戎行久在邊外朕心深為不忍再四思維或應乘此兵力盛強直進賊境俾軍務早完以息將士或應遣使徃彼諭以利害俾其醒悟二者未能遽定特召北路副將軍額駙策凌西路署大將軍查郎阿來京與辦理軍機之大臣悉心計議伊等意見亦不畫一朕思軍務關係重大應博採衆論詳慎籌畫著

王公滿漢文武大臣公同會議各抒己見據實具奏
命達賴喇嘛等還藏

上諭辦理軍機大臣等曰從前令達賴喇嘛移駐泰寧
原因彼時藏中有阿爾布巴等事恐準噶爾逆賊乘
間來犯是以令其移至近邊地方以便照看其隨來
之弟子人等久離鄉土未免懷歸今貝勒頗羅鼐實
心効力將唐古忒厄魯特之兵操練精熟各處緊要
隘口俱已嚴固防守藏中晏然無事班禪額爾德尼

年邁有疾應令達賴喇嘛回藏著果親王允禮前往
泰寧與達賴喇嘛相見章嘉胡土克圖亦令同去并
著都統鼐格前往料理伊等起身副都統福壽等沿
途照看

命果親王赴泰寧沿途閱兵

上諭辦理軍機大臣等曰朕命果親王前往泰寧地方
沿途經過之直隸山西陝西四川等處駐防滿洲官
兵並督撫提鎮標營綠旗官兵俱令順便閱看

命致祭陣亡官兵於和通呼爾哈

上諭辦理軍機大臣等曰爾等傳諭大將軍平郡王令其未撤兵以前酌量於和通呼爾哈處遣人將陣亡官兵遺骸收瘞動用軍中錢糧致祭

命查郎阿等量撤兵丁并分別効力未効力官兵等次

報部

上諭辦理軍機大臣等曰額駙策凌署大將軍查郎阿回至軍營時令其酌量留兵防守邊界其餘兵丁查

無弟兄子姪之孤身及從前久在軍營行走者或此次立有勞績被傷者俱行撤回再將官弁効力行走之處分為三等造冊咨部其効力超卓者為一等以應陞之缺即用照常効力者為二等酌量加恩未經効力者以三等註冊各該管大臣官員等務須從公分別等次若有徇情挾私顛倒失實者後經查出定行加倍治罪

戊戌

命遣使往諭噶爾丹策零撤兵駐察罕度爾

和碩康親王巴爾圖等遵

旨議奏言準噶爾賊夷世濟其惡屢次興戎噶爾丹策零狂悖兇頑較伊父策妄阿喇布坦更甚我

皇上為安逸生靈計欲特賜包容遣使前往開陳利害但賊人狡詐性成恐難遽信目今兩路大兵駐劄邊境賊夷之地勢情形俱已深悉且糧糗馬駝軍裝器械無不預備整齊宜乘此時於北路

發兵三萬西路發兵二萬約會齊進並力殲除
如賊果知畏懼悔禍乞

恩我

皇上再寬其罪戾議定邊界又大學士張廷玉等遵

旨議奏言噶爾丹策零擾害生靈早應發遣大兵立加

屠滅惟是我

聖祖仁皇帝如天之仁於策妄阿喇布坦狂悖妄行猶

復曲賜包容不加誅戮我

皇上以

聖祖之心為心屢示

恩諭俾息紛爭恐伊孟浪輕舉騷擾蒙古是以駐兵邊地以為防範仍諭兩路大將軍停止進剿仰見天心仁愛原非必欲毀其巢穴滅其醜類也今賊人自額爾得尼招大敗之後勢窮力竭本年春間我兵從北路襲擊直越額爾齊斯賊夷驚惶不敢迎戰但罔識

聖心之寬大自以負罪深重不可復追因此迷而不悟
日益冥頑若蒙特遣大臣前往曉以利害寬其
已往之愆予以更新之路噶爾丹策零審度勢
力實不能支諒必誠心悔過俯首求和若仍執
迷不悟則是伊自速滅亡再議征討更覺事易
功倍奏入得

旨準噶爾一部落習尚貪殘世濟其惡策妄阿喇布坦
狡獪非常當其跳梁之時我

皇考聖祖仁皇帝審觀形勢洞悉機宜曾密諭曰彼地遼遠我往則我師徒勞彼來則彼師受困是以經理八九年惟令兩路將軍陳師邊境以待之即將軍富寧安傅爾丹之屢次襲擊亦欲誘之使來便於邀擊而賊究不至富寧安等亦未多獲而歸此當日之情形也及朕即位之初籌畫邊事敬佩

皇考之明訓確知策妄阿喇布坦之姦頑特重不肯輕舉且以將弁兵丁等久役于外勤勞可念因將兩路

兵馬撤回暫令休息中間緣清畫疆界一事遣人曉諭再三朕則開誠布公彼則支吾巧詐朕仍包容寬宥之未幾策妄阿喇布坦身故伊子噶爾丹策零繼領部落朕慮有侵擾衆蒙古之舉不得不預為防範又以其人孟浪無知剽輕任性必率賊衆冒昧前來是以仍于兩路駐劄大兵至於命將一事岳鍾琪久在西陲習於軍旅伊亦踴躍從事因命為西路大將軍北路大將軍傅爾丹朕恐其才具不勝重任爰允

廷臣之推舉並遣查弼納為副將軍伊陞辭之時朕
諄諄詳諭令部署完密度勢審機務策萬全實冀專
聞之大臣戮力同心不負簡用也乃噶爾丹策零輕
舉妄動果不出朕之所料於雍正八年冬月發兵侵
犯西路此正我師乘時擊賊之機會而岳鍾琪來京
陛見請將大將軍印務交與紀成斌署理前此岳鍾
琪身在軍營全無布置將駝馬牲畜十數萬置於賊
人來路之旁供其掠取紀成斌庸懦不堪于賊人來

犯之時畏縮驚惶一籌莫展致賊人得志而去次年賊以全力向我北路初北路領兵大臣與喀爾喀等皆懷賊人斷不敢來犯之心一切軍需又未預為完備傅爾丹查弼納等復誤聽俘虜誑言並不奏聞領兵輕進彼時朕即向廷臣言之賊人恐有詭詐我師此進甚不妥協未幾奏至果墮術中雍正十年正月賊人僅以七千之衆來犯西路深入哈密塔勒納沁地方此又易於大創之機會而岳鍾琪身處軍營調

度乖舛坐令入網之獸復得駭逸此西路軍營人人切齒痛恨者于是賊志愈驕肆無忌憚傾其醜類以向北路越過察罕廋爾軍營直至額爾得尼招地方副將軍額駙策凌等奮勇擊殺殲其精銳將及萬人餘賊喪膽乘夜遁逃經由扎克拜達里克一帶此地朕預設重兵萬有四千以遏賊歸路似此殘敗之賊誠如釜底遊魂但遣兵數千人遮擊便可使隻騎不返乃馬爾賽坐守空城一旅不發賊至不擊賊去不

追俾餘孽猶存遑氛未息馬爾賽之罪誠擢髮難數也總之朕之籌畫於事先者雖未有爽而臣工之失機於臨事者則不一而足矣今賊人自額爾得尼招大創之後畏我兵威遷徙遠去看此情形兩路軍務一時難以告竣特召兩路領兵將軍來京與辦理軍機之大臣悉心計議北路副將軍額駙策凌西路署大將軍查郎阿力主進剿朕以軍務關係重大復令在朝王公滿漢文武大臣公同集議茲覽所奏意見

亦不畫一據兩路將軍皆言兵力有餘士氣奮勇賊勢窮蹙人心離散似此則遣兵進討未嘗不可但皇考當年聖意與朕本心俱不欲勞師遠涉而駐兵防守邊界又未免時日耽延將士久勞朕心不忍朕意且遣使臣前往準噶爾面諭噶爾丹策零曉以利害示以寬大之恩旨開其迷誤從此畫清邊界彼此不得逾越著北路大將軍平郡王將進駐科卜多之大兵仍撤回察罕廋爾以釋賊人疑懼之心若噶爾丹

策零聞朕諭旨果有悔心之萌一一遵行則大路大兵俱可徐徐議撤倘仍執迷怙惡自取滅亡俟使臣回京之日別作計議

辛丑

命加恩青海蒙古等

上諭辦理軍機大臣等曰朕聞青海蒙古生計甚艱著傳諭馬爾泰等加意施恩方於伊等生計有益

命傳諭平郡王福彭撤兵事宜

上諭辦理軍機大臣等曰爾等傳諭大將軍平郡王現
令調兩路將軍來京商議軍營事宜將來進剿科卜
多之兵或仍撤回察罕度爾其由烏里雅蘇台運往
科卜多之米糧馬匹等項有應行停止撥回之處著
預為辦理撤兵時平郡王領兵居中塔爾岱常德領
兵殿後其前隊之兵酌量派委大臣帶領

八月丙午

命侍郎傅鼐額外內閣學士阿克敦副都統羅密赴準

噶爾傳

諭噶爾丹策零

上諭曰從前爾遣使特磊奏聞爾父亡故彼時朕即召
入特磊面降諭旨詳加開導令將羅卜藏丹津送至
越二三載並無回奏故於兩路駐兵防守邊界爾乃
遣特磊奏稱已將羅卜藏丹津拏送至途間聞有兵
至故暫停解送特遣人懇求指示伏願廣興黃教愛
惜生靈等語朕即遣使臣杭奕祿衆佛保同特磊前

往巴里坤軍營與爾商議諸事因朕躬違和故未將
特磊召見令部臣傳旨遣回即有疑難不便之處亦
當彼此遣使議和豈有輕動兵戈之理特磊乃卑賤
之人未免捏詞告爾以圖僨事爾若果無動兵之心
為生靈黃教起見則當向我國使臣懇切陳奏乃並
未接見使臣猝然發兵侵我巴里坤軍營搶去馬匹
又發兵阿爾台地方彼時我國將軍大臣未行請旨
忽畧輕動致爾得利未幾爾兵侵我卡倫我兵於蘇

克阿勒達呼地方迎戰爾遂收兵退去次歲爾復協
力來擾喀爾喀游牧被我師輕騎掩殺戰於額爾得
尼招地方爾兵大敗今春我哨探兵丁至額爾齊斯
地方時爾游牧處人俱行遁匿烏魯木齊駐劄之人
亦行移去我兩路將軍大臣即欲盡驅雄兵乘勢進
剿朕悉諭令停止朕為天下元后惟以好生為本並
無將準噶爾必行剿滅之意况得爾國土地人民於
我大國亦何補之有爾若執迷不怠干戈則我師更

換駐防毫無缺乏之慮不過稍費糧餉耳但如此相持日久彼此相勞非徒士卒苦累而馬匹牲畜亦多損傷是以朕心深為惻然今特遣使臣侍郎傅鼐學士阿克敦副都統羅密等前來宣諭朕意與爾商議愛惜生靈彼此罷兵之事若我大兵仍在游牧附近處駐劄恐爾心生疑貳今巴里坤軍兵因使臣由彼處遣往故暫令守候駐劄其北路已抵阿爾台軍兵俱撤至察罕度爾爾果欲遵旨罷兵同享安逸即與

遣往之大臣明白定議朕已將一切事務面諭大臣爾宜詳思如誠心知過痛改前愆樂遵朕旨則朕將往事盡行寬宥斷不食言至於是非利害爾宜酌定欲搆兵欲止戈欲安逸衆庶欲殘害生靈亦惟爾擇而行之特諭

癸丑

命李如栢率直隸等四省更代兵赴北路

辦理軍機大臣等議奏言有

旨命議選直隸山東山西河南四省兵赴北路軍營更
代其統領綠旗兵丁河北總兵官胡傑應一體

更代請

欽命一人率兵赴軍奏入得

旨總統四省綠旗兵丁著署山西大同總兵李如栢前
往

甲寅

命革滿珠錫禮職軍前効力贖罪

上諭辦理軍機大臣等曰滿珠錫禮自朕簡用副都統
以來有意敗壞國政伊身係宗室且並非愚昧無能
之人乃明知故為情殊可惡著革職交與馬蘭泰令
其隨披甲隊內在軍前効力贖罪如乖謬之性仍不
悛改著馬蘭泰即行叅奏

丙辰

議量撤北路軍營防戍等兵

辦理軍機大臣等議奏言北路軍營現有滿洲

蒙古綠旗兵共六萬餘今年科卜多兵撤還烏里雅蘇台請於防戍兵及傅爾丹率往兵丁中其著有勞績或家惟單身無依者京師滿洲兵量撤五百奉天吉林黑龍江兵量撤一千寧夏右衛暨翁牛特內扎薩克等處兵悉撤之分別給與車馬餘兵暫留駐劄奏入

上從之尋定邊大將軍平郡王福彭奏言北路軍營運卹量撤兵丁臣已令都統祖秉衡率漢軍官兵營總等

率防戍兵及寧夏右衛等兵於八月十九日自
軍營啟行其攜帶家口察哈爾土默特兵一千
令副都統職銜色爾古楞率赴歸化城俟安插
畢令色爾古楞赴京奏入報

聞

九月壬辰

命議叙鄂隆吉大坂勦賊功

西路副將軍張廣泗等奏言九月初四日偵知

烏爾圖河地方有賊數百臣即飛檄副都統班第達什原任總兵官張元佐遊擊郎建業於初五日五鼓悉赴哈洮以南蘆草溝一帶又飛檄固原提督樊廷率兵赴麒麟泉子分路搜剿果於哈洮遇賊潛伏我兵奪據山梁深入賊隊屢敗之遂越噶順直抵鄂隆吉大坂斬賊四百餘生擒者三十六人所獲馬匹器械糧物無算復追擊百八十里餘賊悉負傷遠遁奏入得

旨張廣泗調度分遣悉協機宜在事將弁兵丁等俱各奮勇直前得獲全勝甚屬可嘉著從優議叙賞賚署大將軍查郎阿雖奉調來京然自統兵以來與張廣泗同心協力整飭戎行鼓勵士氣此番克捷亦由查郎阿平日訓練整頓之所致著一併交部從優議叙

丁酉

定邊大將軍平郡王福彭奏北路撤兵事宜

福彭奏言北路兵進勒者臣等遵

旨撤還九月初六日臣率奉天兵二千吉林兵一千黑龍江兵一千自科卜多啟行令副都統王常率右衛兵一千前行副將軍塔爾岱常德等率餘兵殿並遠設卡倫瞭望防範行至察罕鄂羅木分兵三隊臣率一隊由空圭中路仍令塔爾岱等居後又令公根丕勒哨兵居後殿叅贊阿岱率一隊由扎卜堪路以公敏珠爾哨兵殿副都統哲庫訥率一隊由空圭北路以貝勒成袞扎

布哨兵殿分道撤還俟大軍齊集過冬所在酌
令察哈爾厄魯特兵索倫兵並內大臣哈達哈
等所領黑龍江兵副都統富昌等所領吉林兵
副都統額爾勤等所領奉天兵分駐魯約蘇圖
蒙固勒烏拉克沁等處京城八旗兵寧夏兵察
哈爾土默特兵並叅贊阿岱所領奉天兵副都
統布爾沙等所領黑龍江兵分駐布爾哈雅銓
格爾格等處家選兵駐劄濟斯布隆集魯穆會

盟兵四子部落兵駐劄扎卜堪河都統諾爾琿
等所領漢軍兵五百並駐烏里雅蘇台兵一千
五百合為一營駐劄察罕廋爾城中歸化城土
默特兵綠旗兵烏蘭察卜會盟兵並副都統白
爾赫圖所領奉天兵悉在烏里雅蘇台城外附
近有水草處駐劄再喀爾喀游牧所在遼遠酌
令喀爾喀兵丁在大軍迤東駐劄其哨探兵分
三路每路撥滿洲及內扎薩克兵二百五十喀

爾喀兵二百五十所有各處卡倫減撤一半自
卡倫至大營仍分三路設立臺站如故以資聲
援俟大軍駐定後再酌量辦理奏入報

聞尋福彭奏言臣自科卜多撤兵分三路行至空圭河
擇附近有水草處將臣所率奉天吉林黑龍江
兵各一千駐劄過冬其察罕鄂羅木所貯米石
量給探哨官兵餘悉運至空圭河機達渾處留
綠旗兵三千守之又令前鋒統領塔爾瑪善即

統前鋒兵八百於機達渾附近彈壓其王羅卜
藏等所率內扎薩克兵及貝勒成衮扎布等所
率喀喇沁土默特兵並相接駐劄臣率右衛兵
一千奉天兵一千於十月初一日抵烏里雅蘇
台軍營奏入報

聞

冬十月丁未

命察勘撫恤甘肅歟收州縣

上諭內閣曰數年以來甘肅等處地方辦理軍需民人等輓輸効力朕心深為軫念已屢加恩澤以示嘉獎前據督撫等奏報今年禾麥收成俱好朕心甚慰今聞秋間有雨少之州縣如階州靖遠環縣數處收成不足民食稍艱或他處有似此者亦未可定著劉於義許容確加訪查所有歉收之處或應蠲免或應停徵其乏食之民如何撫恤一面定議奏聞一面即行辦理若西安所屬有秋田歉薄之州縣著史貽直碩

色亦即確查奏聞照此辦理

壬子

議叙西路庫爾默圖官兵勦賊功陝西涼州鎮
標中營遊擊郎建業等加銜有差兵丁等賞賚
如例

十一月戊寅

命總管覺和托協同總管五十四辦理阿爾台軍臺事
務

戊子

命額駙興德赴達里剛愛軍營

上諭辦理軍機大臣等曰額駙興德著給與十年俸銀
前往達里剛愛軍營協同散秩大臣四格等操演蒙
古兵丁効力行走

壬辰

命北路副將軍常德來京

庚子

命議酌賞哈密回民地畝事宜

上諭辦理軍機大臣等曰據哈密貝子額敏奏稱所屬回民等有可種四百石穀之地現在軍營屯田界內願將此作為官地等語哈密地方悉皆朕土無俟伊等獻納且大兵既撤之後此地皆可留與哈密亦斷無因其獻地另行安置民人之理但此地現與官地交錯若不允其所請照舊令回民耕種難免互相爭角倘收為官地又係回民生計所資朕意或另賞伊

等地畝及牛具籽種或每歲將應得穀石折給銀兩之處著署大將軍查郎阿等就近查議

十二月壬寅朔

議叙西路哈兆等處勦賊功署寧遠大將軍查郎阿等加級晉銜有差

辛酉

定邊大將軍福彭奏報鄂爾昆濟爾瑪台等處屯田獲大麥小麥糜子一萬九千七百石有奇

奏入得

旨下部知之

命罷進勦卓子山碁子山官弁議叙

兵部以進勦卓子山碁子山及青海南北西三川等處功奏請議叙奏入得

旨軍功議敘乃國家賞功之大典必至公至確始足以表章勞績鼓勵軍心從前卓子山碁子山征勦一案乃年羹堯岳鍾琪張大其事有意捏成者即在事効

力官弁亦不過以伊等私心任意開入冊內冀邀議敘並無功績可紀應不准議叙從前有已經議敘者著該部查明註銷其南北西三川青海効力人員仍准其議叙

雍正十三年春二月乙巳

命博第赴喀爾喀

上諭辦理軍機大臣等曰管轄呼倫貝爾兵丁之都統博第著赴喀爾喀地方會同查克旦查辦丹津多爾

濟多收駝隻事件事竣即著回京北路軍營裁撤索
倫兵丁起程時著領侍衛內大臣哈達哈帶領前往
呼倫貝爾協同永福管轄

壬戌

議酌定邊境駐防事宜

辦理軍機大臣等遵

旨議奏言現今準噶爾逆賊敗遁又經使臣前往宣
諭諒賊夷輸款非遙我軍班師在即應預行酌定邊境

駐防事宜除漢中一府地居腹裏不必添駐外
查涼州為甘肅咽喉通省關鍵請駐兵二千名
西寧地處邊隅逼近青海請駐兵一千名此添
駐兵丁俱於西安駐防滿洲蒙古兵內挑選西
安兵缺俟現駐涼州西寧兵丁撤回時於養育
兵暨餘丁內挑補其新駐兵丁請設將軍一員
統領駐劄涼州所有應設協領佐領防禦驍騎
校筆帖式等官令將軍秦布酌議具奏理事同

知通判等官暨一切修理城垣營署軍裝等項
令總督劉於義等詳議具奏預行辦理俟撤兵
後再行派撥駐劄奏入

上從之

丁卯

議撤原駐沙州涼鎮安西兵

署陝西總督劉於義奏言沙州協標出征兵已
撤還沙州足資防範其原撥往沙州涼鎮兵五

百安西兵六百請悉撤還本鎮每年夏秋撥沙
州兵四十赴巴顏布拉克看守墩臺冬春撥安
西兵三百赴推默勒圖等處駐防辦理軍機大
臣等議覆如所請奏入

上從之

三月丙子

命額駙策凌密議定界事宜

上諭辦理軍機大臣等曰據遣往準噶爾使臣傅鼐等

奏稱噶爾丹策零請將哲爾格西喇呼魯蘇地方為
我喀爾喀游牧地界等語朕意伊既如此懇求若堅
執不允恐使臣徒勞往返終無完結之日但朕無由
懸定此係喀爾喀等游牧處額駙策凌素所深知著
將傅鼐等奏摺并地圖密寄額駙策凌令其細閱噶
爾丹策零所請應否准行如不可行或於我原定地
方之內伊原定地方之外另有何處可定邊界暨定
邊界之後其中空閒地方應否禁止彼此打牲之處

俱著詳悉定議事關重大務期永遠有益著於噶爾
丹策零使臣吹納木喀等未到之前具奏尋定邊左
副將軍額駙策凌議奏言噶爾丹策零請以哲
爾格西喇呼魯蘇為我喀爾喀遊牧地界往者
我喀爾喀游牧尚未至此應即如所請行但我
卡倫原設在阿爾台迤東額貝和碩和通鄂博
布廷圖科卜多托爾和烏蘭等處此並在哲爾
格西喇呼魯蘇界外應定議安設卡倫如故至

厄魯特游牧應以額爾齊斯為止否則必以阿爾台嶺為界不得越哈巴博爾濟阿里克台清吉勒等處至中間錯壤之處彼此毋得打牲嗣後阿台迤東令我人巡邏迤西令彼巡邏如此庶爭端可以永息昔策妄阿喇布坦在時其游牧舊在霍博克薩里察罕呼濟爾迤西數年以來漸越額爾齊斯賊性狡詐反覆無常若彼游牧逼近防守實難斷勿令過阿爾台嶺方為

善策奏入報

聞

辛巳

命塔爾岱回黑龍江將軍任

上諭辦理軍機大臣等曰定邊右副將軍塔爾岱在北
路軍營歷有多年且身被傷殘現在軍營無事著回
黑龍江將軍任所給假一年調理病症其將軍事務
仍著那蘇圖署理

平定準噶爾方略前編卷三十六

欽定四庫全書

平定準噶爾方略前編卷三十七

雍正十三年夏四月丙午

命以倉糧借給鄂爾多斯乏食蒙古

上諭大學士等曰前據理藩院奏稱鄂爾多斯上年收成歉薄貝子羅卜藏請借倉糧議令辦理夷情事務郎中七十五會同該扎薩克查明乏食蒙古先借支一月口糧其在秋成之前應再行借支定議呈報等

語朕已允行又據貝勒查木陽貝子齊旺班珠爾納
木扎爾色楞等請借倉糧亦經理藩院議令七十五
達色照議辦理今朕聞陝西神木榆林等處上年收
成歉薄糧價昂貴而鄂爾多斯蒙古之乏食者多向
神木榆林城內就食甚為可憫該郎中七十五等從
前未曾呈報及奉旨查辦之後又復怠忽遲延竟不
上緊辦理甚屬不合著七十五等即行會同該道將
乏食蒙古查明一面具報該督撫一面酌動倉糧發

給母使乏食蒙古至於失所至於神木榆林等處乏
食民人亦著該地方官查明酌量辦理

命色楞赴西寧

上諭辦理軍機大臣等曰辦理青海事務達鼐病故著
散秩大臣色楞前往西寧辦青海事務

辛亥

議叙北路克爾森齊老擊賊陣亡官兵

吏部遵

旨議奏言北路軍營官兵於克爾森齊老擊賊大捷陣
亡官兵應加恩議叙奉天正紅旗騎都尉兼一
雲騎尉北京從優授二等輕車都尉鑲白旗領
催珠里黑龍江正黃旗副驍騎校費雅思哈授
騎都尉吉林驍騎校奇弩鑲藍旗領催奔博里
黑龍江鑲紅旗領催馬爾圖授雲騎尉各給與
祭奠並以應襲之人引

見承襲奏入

上從之

甲寅

命停運軍糧

上諭辦理軍機大臣等曰現今內地估撥軍糧有已經出口運送在途者著即於哈密橋灣布隆吉爾等處就近收貯不必再運巴里坤其未經出口糧石亦著暫停運送可傳諭署陝西總督劉於義知之

命密議留駐兵丁事宜

辦理軍機大臣等遵

旨議奏言北路軍營官兵臣等與副將軍常德詳加籌畫應於新撥滿洲蒙古綠旗兵中選留二萬分駐所在形勝處餘悉撤還鄂爾昆等處去年更換綠旗兵八百仍留種地奏入得

旨北路軍營駐兵二萬之處可密行文商之大將軍平郡王今噶爾丹策零雖遣使求和而疆界尚未定議不可深信俟準噶爾傾心歸順始可酌量撤兵若駐

兵不敷禦敵之用則不如不駐兵矣但兵數太多未免耗費國帑務須詳悉籌畫此二萬兵能否禦敵之處著大將軍副將軍等公同妥議密奏

已未

命禁止榆林邊外偷盜牲畜鬻賣人口諸弊

陝西延綏總兵官米國正奏言榆林邊城以外並河套夷民雜處交易為生鄂爾多斯一部風氣素號渾樸近日多有內地民人導夷人進口

者偷盜牲畜窩藏分利而神木口居民設店熟
悉夷情多方欺誘或不肖弁兵通同容隱或所
屬衙門模糊了事致夷人無從申訴應請飭行
沿邊文員一體稽察以安夷衆再榆林居民鮮
知禮義鬻賣妻子相習成風甚至呈明地方有
司彼此交易並請嚴飭所在有司立法禁止以
端風化奏入得

旨著交與該地方文武官員實力奉行仍令督撫提鎮

等不時稽查

閏四月丁丑

命安插鄂爾多斯貧乏蒙古

上諭辦理軍機大臣等曰聞鄂爾多斯貧乏蒙古有就食口內典賣妻子人口者著交該地方官查明照原價賞給贖出加意安插請旨如有隱匿遺漏者後經查出定行從重治罪

戊子

命以達瑪林襲封車臣汗

喀爾喀車臣汗吹扎卜卒理藩院以應承襲者

引

見得

旨車臣汗之號著原爵車臣汗滾臣之子達瑪林承襲
原爵車臣汗吹扎卜之子德木楚克著承襲伊父扎
薩克多羅郡王伊叔恭格薩木丕勒著仍在郡王上
行走

丁酉

命遣使諭噶爾丹策零定議疆界賞給各色緞疋
上諭準噶爾台吉噶爾丹策零曰朕軫念衆庶止息兵
戈振興黃教安逸生靈用是特遣使臣降旨宣諭爾
極悅服遣吹納木喀等進貢齋表內稱若使後世言
某皇帝與某台吉失好以致衆生勞苦殊非美名若
互相和好振興黃教安逸生靈則可垂休聲於永久
等語朕披覽之際不勝嘉許欣悅果能知此

天必賜之以福若不知此惟以貪暴為事則

天亦必加之以禍此常理也至於構兵之由爾意若自朕始者昔我

聖祖皇考時衆云準噶爾之人秉性貪暴好尚兵戈侵擾鄰封不崇釋氏仁慈之道彼時朕猶未深信後爾父策妄阿喇布坦無端侵我哈密又遣兵赴藏擾亂佛教殘毀寺廟傷害喇嘛朕始知前言不妄似此則兩路之駐兵防範謂始自我

皇考可乎我

皇考聖心仁愛惟欲安撫衆生故遣使來往數次乃爾
父推托遷延始終無定朕纘承大統爾父又遣根敦
來京朕仰體

皇考仁愛之心仍欲和好俾黃教振興生靈安逸今根
敦至朕前親執其手諭云爾回時可告知爾台吉朕
執爾之手即如見爾台吉之面朕與爾台吉應俱教
訓子孫輩令其永遠和好於是遣使議和定界詎意

爾父並無和好之意屢次托故遷延且藏匿我朝之
逃亡羅卜藏丹津並未告知使臣以致諸事未成和
議中止自此朕亦未遣使前去爾亦不遣使來京後
爾父物故爾遣特磊奏云爾父已成佛矣不思佛為
天下人之所尊禮者爾云成佛其誰尊禮乎且特磊
舉動驕慢不知禮法是以朕諭特磊云爾台吉若果
誠心遵旨和好可將羅卜藏丹津解送前來並將邊
疆定界朕豈有遣發大兵之理乃爾之和好未定則

爾意實未可測不得不為防範故兩路有駐兵之舉
及爾又遣特磊前來奏稱羅卜藏丹津已解至中途
聞大兵發遣是以中止爾若果將羅卜藏丹津解送
自應直到軍營何以中道而返耶朕因解送羅卜藏
丹津之言涉於虛妄故於特磊回時令部內加以拂
意之言責以難行之事然並未勒令遵行也若果勒
令遵行自應寫入勅諭之內乃不寫入勅諭祇於部
內行文者特令爾知非朕意也爾縱有難行之處亦

應聲明陳奏何以並無回覆而於使臣在巴里坤軍營等候之際潛兵盜我馬匹此非構兵自爾乎我兵果欲進勦則於特磊去後乘爾兵無備之時不行襲擊轉俟爾兵有備有是理乎此俱已往之事朕既軫念衆生將爾從前過愆悉已寬宥無容置議今爾既遵循禮義敬奉朕旨歡悅順從欲修和好遣使來京朕心甚嘉之再爾使吹納木喀等口奏從前曾言將羅卜藏丹津解送俟大事定後不難辦理至定界一

事阿爾台原係厄魯特游牧之地杭愛原係喀爾喀
游牧之地請由哲爾格西喇呼魯蘇等處至巴里坤
地方定為邊界等語羅卜藏丹津爾從前既屢奏解
送即與解送無異但所云阿爾台係厄魯特游牧之
地此噶爾丹從前之事噶爾丹為我兵勦滅取其土
地並其骨殖子孫俱經爾父獻納此衆人所共知者
現今噶爾丹之屬人及丹濟拉之子孫俱在內地爾
準噶爾曾未越阿爾台游牧居住乃謂為厄魯特游

牧之地可乎且喀爾喀等尚不令近阿爾台游牧者
原欲使兩界相隔稍遠可息爭端而可令準噶爾之
人居此乎夫永遠和好之事定界實為要議朕特命
大臣等與吹納木喀等公同酌議務期兩有裨益指
定邊界具奏而吹納木喀等云我台吉所交口奏言
詞之外並無別語不便擅定等語此事在京既不能
定議用是再頒敕諭遣來使吹納木喀等齎回若果
誠心修好疆界不可不明設日後無知之人越界妄

行稍有爭競則又生事端矣況定界之說原起於爾
父策妄阿喇布坦奏請以安衆生者彼時朕曾降旨
嘉許後又請將阿爾台山梁外哈道里哈達清濟勒
布拉清濟勒三處不必置為閒地朕未准行今特欲
安逸衆生永遠和好將此三處空閒之地俱屬於爾
祇自克木齊克汗騰格里上阿爾台山梁由索勒畢
嶺下哈卜塔克拜塔克之中過烏蘭烏蘇直抵噶斯
口為界並將爾父所請自呼遜托輝至喀喇巴爾楚

克悉作空閒之地似此分界在爾並無難行不便之處爾其仰體朕加恩眷注之意遵諭定界方可永遠修好朕為天下主惟思扶持黃教利濟衆生敦崇和睦執中循禮斷不强汝以難行者至於不便大國之處亦不能俯允爾請也倘爾遵奉諭旨議定疆界之後猶以喀爾喀之游牧逼近爾屬不免疑懼奏請稍展空閒之地亦屬可行俟爾遣使再來陳奏時朕當另降諭旨台吉其熟思詳審酌定具奏

戊戌

命常賚總統留駐巴里坤兵丁顏清如馬會伯協同辦事

辦理軍機大臣等遵

旨議奏言西路軍營兵丁臣等議以打牲烏拉兵一千赴北路駐劄選綠旗兵一萬於巴里坤駐防留兵一千增防哈密其總統協辦大臣及領兵提督總兵等應請

欽命餘兵俟準噶爾使臣還後悉撤之再巴里坤既留駐兵丁一切文移並須鈐印現今軍營有鎮安將軍揚武將軍振威將軍三印請以鎮安將軍印給總統大臣掌管其揚武將軍振威將軍印應令查郎阿與寧遠大將軍印一併賫回繳上奏入得

旨留駐巴里坤兵丁著內大臣常賚總統提督顏清如原任尚書馬會伯協同辦事總兵張朝良楊琿管領

兵丁其留駐哈密兵丁著查郎阿酌派大員管領餘
依議

議北路軍營撤兵駐兵事宜

命平郡王福彭仍留統轄薩木哈等協理事務

定邊大將軍平郡王福彭遵

旨議奏言北路撤兵駐兵事宜一軍營應留滿洲蒙古
兵二萬量撥洪郭爾鄂隆所調京城滿洲兵二
千烏里雅蘇台駐劄滿洲兵一千令侯馬蘭泰

護軍統領職銜吉當阿副都統富達禮轄之家
選兵二千令護軍統領阿成阿副都統敦巴轄
之漢軍兵一千令都統諾爾琿石禮哈轄之奉
天兵四千令護軍統領瑚琳噶爾錫副都統席
爾璫哲庫轄之吉林兵二千令副都統富昌阿
思哈轄之索倫兵二千令副都統職銜巴里孟
古翟三轄之打牲烏拉兵一千令護軍統領職
銜哈岱轄之牧廠察哈爾兵一千令副都統綽

爾多學士吳金轄之四子部落兵一千令王阿喇卜坦多爾濟轄之鄂爾多斯兵一千令貝勒查木陽轄之內扎薩克兵一千令喀喇沁公羅卜藏策卜登協理台吉羅卜藏達什轄之察哈爾厄魯特兵四百牧廠兵三百喀喇沁兵三百令散秩大臣巴咱爾轄之其留駐京城滿洲漢軍內扎薩克等兵明年撥兵往代奉天吉林呼倫貝爾牧廠察克爾等兵於丁巳年撥兵往代

俟議定界址將應減撤兵丁再行具奏至防守
臺站鄂爾多斯兵一千應撤其半留兵五百令
副都統圖爾賽席爾塔管轄如故其都統佟時
茂副都統劉瑛協理台吉袞濟扎卜悉撤還一
烏理雅蘇台地屬緊要請選前鋒兵六百並撥
滿洲蒙古兵三千附近駐劄再撥綠旗兵一千
防守城池以前鋒統領塔爾瑪善阿岱轄之其
車臣汗兵五百西三部落兵一千令於烏里雅

蘇台附近鄂衣袞特里默駐劄一撥守卡倫侍
衛護軍三十五人駐防日久請更撥往代一四
省綠旗兵丁除烏里雅蘇台調撥一千外其扎
克拜達里克推河塔米爾三地請各撥綠旗名
五百遣副將等一人率領駐劄一駐劄大兵之
地最要鄂爾昆所在遼濶水草並佳請於其地
酌量建城駐兵糧餉官物移運收貯一兵丁留
駐及撤還者所需糧餉馬匹等應給予如例其

馬蘭泰隊中應撤一千請令護軍統領職銜塔喀爾古善率之還京侯李如栢所率換班綠旗兵至再令軍營綠旗兵起程各還本處辦理軍機大臣等議覆悉如所請其大兵駐劄鄂爾昆或暫令大將軍平郡王福彭留駐總統或別遣大臣前往恭候

欽定奏入得

旨大將軍平郡王著暫留統轄叅贊領侍衛內大臣薩

木哈等著仍協同大將軍平郡王辦理事務前鋒統領阿岱著回京餘依議

五月甲辰

命蠲免甘肅所屬本年應徵地丁錢糧

上諭內閣曰西陲用兵以來一應軍需皆取資於公帑絲毫不以累民惟是甘肅等處運送糧餉不能不藉民力之輸輓朕心軫念屢沛恩膏即當豐稔之年亦下蠲租之詔所以賞百姓之急公示朕心之體恤也

茲聞甘省所屬地方入夏以來有雨澤愆期之州縣
或恐收成稍薄納課艱難著將雍正十三年甘肅通
省所屬應徵地丁錢糧全行蠲免俾催科不擾民力
寬舒該督撫可董率有司實力奉行以副朕加惠秦
民之至意

乙巳

命議西寧涼州改駐兵丁事宜

西安將軍秦布奏言前者辦理軍機大臣議選

西安八旗滿洲蒙古兵三千以二千分駐涼州
一千分駐西寧查西安漢軍兵丁向與滿洲蒙
古一體効力比來生齒日繁請一併入選撥之
列涼州增設城守步兵六百兩旗合設防禦一
員西寧增設步兵四百每翼各設防禦一員轄
之辦理軍機大臣等議覆曰應悉如所請至所
奏內請以分駐西寧兵改駐莊浪涼州兵改駐
涼州城外大七巴之處應令查郎阿馬爾泰詳

議具奏奏入

上從之

壬子

命定議出征兵丁回汛補缺事宜

山西巡撫覺羅石麟疏言赴甘出征兵丁撤還者一時不能得缺請月支養贍銀二兩米三斗俟缺出陸續頂補兵部議覆如所請奏入得

旨出征兵丁既回營汛自應仍補原缺若係步兵自當

拔補馬糧以示獎勵豈有令其待缺頂補之理至招募頂補之兵原係一時權宜之計應令出缺另議養贍候補之法方為允協令巡撫石麟議令出征兵丁候缺兵部即照此議覆俱屬不合著另行定議並行令派兵之省分一體遵行

戊午

命懲江寧荊州滿洲官兵赴巴里坤者損畜失道之罪署寧遠大將軍查郎阿等奏言前者江寧荊州

滿洲兵丁調赴巴里坤沿途倒斃走失馬騾應請以兩營牧馬之協領阿山泰常在等五十四人革職留任馬匹追償其餘管轄不嚴者應均著分賠至革職副都統阿克山觀音保應賠馬匹一并追出辦理軍機大臣等議覆應如所請奏入得

旨此次調往巴里坤之江寧荊州滿洲官兵全然不知行兵之道馬匹牲畜損傷過多不耐寒冷勞苦復有

迷失兵丁種種罪愆此皆官弁向日耽於安逸廢弛
滿洲舊規甚為無耻此次官兵不准以出兵記檔俟
兵丁撤回時將領兵前往之協領以下驍騎校以上
等官俱著同家屬搬移回京交該旗帶領引見其如
何令其學習補用之處候朕另降諭旨伊等員缺令
該將軍另行揀選題補若該處不能得人著奏聞由
京城揀選前往

庚申

命北路撤還兵丁在額爾得尼招効力奮勇者該旗查

奏請

旨

上諭辦理軍機大臣等曰北路軍營陸續撤回官兵內
有在額爾得尼招地方打仗効力及奮勇出羣者俟
到京時俱行查出併開明該將軍所出考語令各該
旗具奏請旨

命革諾爾琿職仍留軍前効力

定邊大將軍平郡王福彭劾奏言鑲黃旗漢軍都統諾爾琿懦弱昏憤不能管轄員弁約束家人又私用官馬擅扣兵糧殊屬溺職奏入得旨諾爾琿著革職仍留軍前當苦差効力行走

辛酉

命鑲黃旗漢軍副都統劉瑛仍留軍前與鑲白旗漢軍都統石禮哈管轄漢軍兵丁

丙寅

上諭辦理軍機大臣等曰準噶爾使臣吹納木喀等到
巴里坤軍營起身後著副將軍張廣泗回至西安候
旨另有用處

署寧遠大將軍查郎阿奏西路撤兵事宜

查郎阿等奏言噶爾丹策零現今遣使齎表求
和軍營滿洲蒙古官兵應行撤回者俟準噶爾
使臣回後請按程挨次分隊行走第一隊貝勒
特古斯率科爾沁兵一千名由喀爾喀河索約

爾濟山前赴原駐牧處其索倫兵一百名應令
營總翼本叅領薩都拜等率之與科爾沁兵同
行至喀爾喀河分路前赴齊齊哈爾第二隊內
大臣顧魯率原管察哈爾兵一千名由奈曼等
路赴駐牧處所其巴爾虎兵一百名應令侍衛
噶扎爾圖率之同往第三隊副都統達什率東
四旗察哈爾兵一千名由翁金河前赴駐牧處
所其奉天吉林兵一百名應令原管副都統烏

察喇率之同行行至八溝分路各回本處第四
隊副都統班第率西四旗察哈爾兵一千名行
至歸化成前赴本游牧處第五隊副都統喀喇
率巴圖魯兵一百五十名令赴肅州酌量遣官
分領第六隊散秩大臣安楚護率土默特兵四
百名由塔勒納沁進嘉峪關會同都統根敦沿
邊前赴歸化城第七隊一等台吉定咱喇什率
鄂爾多斯兵五百名行至肅州會同副都統班

第等由寧夏出口還原游牧處第八隊協理台
吉羅卜藏率和托輝特兵一百名由奈曼明安
一帶赴駐牧處所第九隊貝子衮布率厄魯特
兵五百名由鎮番前赴駐牧處所其內地行走
之滿洲官兵內江寧滿洲兵一千名為第一隊
荊州滿洲兵一千名為第二隊分西安兵三千
名為三隊與寧夏滿兵並依次起行俱令原管
將軍副都統等率之進嘉峪關抵肅州各還本

處至綠旗兵丁現在軍營共二萬四千七十餘
名內有勇健兵丁到營日淺應行留駐再於西
安督標及固原寧夏延綏興漢等處兵丁共選
留一萬一千名以一萬名駐劄巴里坤一千名
增防哈密其餘俟滿洲蒙古兵丁起行後亦挨
次撤回令各營原管之大員率之進口以備訓
練奏入報

聞

戊辰

議涼州西寧設官駐兵事宜

西安將軍秦布奏言涼州西寧議令設兵駐防
彈壓蒙古番人今涼州駐兵二千名內請選漢
仗好者二百名為前鋒滿洲八旗兩翼各設協
領一員蒙古八旗兩翼各設協領一員滿洲每
旗設佐領二員蒙古每旗設佐領一員每佐領
各設防禦一員驍騎校一員領催五名其行文

事件設筆帖式三員西寧駐兵一千名內請選漢仗好者一百名為前鋒滿洲八旗兩翼各設協領一員蒙古八旗兩翼合設協領一員滿洲每旗各設佐領一員防禦一員驍騎校一員領催五名蒙古兩旗合設佐領一員防禦各一員驍騎校各一員每旗設領催二名其行文事件設筆帖式二員西寧止議設副都統一員恐事務繁多應於協領內揀選一員令其協辦涼州

將軍衙門請如西安例設立二司其將軍副都
統印信二司關防協領條記請交部鑄給至官
兵俸餉口糧草豆等項支領如西安例辦理軍
機大臣等議覆悉如所請奏入

上從之

平定準噶爾方略前編卷三十七

欽定四庫全書

平定準噶爾方略前編卷三十八

雍正十三年夏六月癸酉

議西路撤兵事宜

辦理軍機大臣等議覆言署寧遠大將軍查郎
阿等奏西路軍營撤兵事宜一巴圖魯官兵進
口後定例止給口糧索倫奉天吉林等兵並道
遠恐盤費不足請官借三月俸銀兵丁借半年

餉銀悉以軍需銀支給造冊報部即於俸餉內扣還如數應如所請一江寧等處滿洲兵行經內地盤費亦恐不足請於到肅日江寧荊州官借三月俸銀兵丁借四月餉銀西安寧夏官借三月俸銀兵丁借兩月餉銀所借給銀並於官兵俸餉內扣還查江寧荊州領兵各官如協領阿山泰常在等五十四人前以倒斃馬匹並議革職留任例不支俸現在無項可抵應毋庸議

至江寧荊州及西安寧夏官兵等奏請借銀數亦過多臣等酌議江寧荊州兵丁給兩月餉西安寧夏官給三月俸兵丁給一月餉所借給銀報部扣還奏入得

旨索倫奉天吉林官兵効力行走頗著勤勞且路途遙遠伊等所借俸餉銀兩俱著賞給不必扣還江寧荊州滿洲之官兵在軍前諸凡不及廢弛滿洲舊規甚為無恥爾等所議不准借給官員俸銀之處甚是餘

依議

丙子

議西路駐兵事宜

署寧遠大將軍查郎阿等奏西路駐兵事宜一
邊界定後廷議於巴里坤留兵二千哈密留兵
二千更番駐劄按巴里坤隘口每歲雪後處處
可行若留兵二千即盡數撥防亦不足用至哈
密留兵二千以屯田則不敷以巡防則難遍且

巴里坤與哈密中間南山大坂倉猝不通聲息
比秋冬雪降呼應更難臣等酌議與其分駐於
兩地不若合駐於山南應以留駐巴里坤兵二
千再增一千悉駐哈密合兵五千則兵力不分
巡防屯牧咸可辦理此五千人哈密實駐三千
其西三堡沙泉東北塔勒納沁並有城堡可
各駐兵一千三地聯絡指臂相應方為嚴密一
軍營馬駝哈密附近一帶夏日炎熱宜牧處少

應俟每年播種後山北草肥撥哈密兵一千塔勒納沁沙棗泉兵五百合二千人令統領大臣率至山北招摩多呼濟爾台沙山子鹿心山等處牧放比深秋仍還山南過冬其過夏牧馬時應增設斤墩請於烏爾圖哈達伊克恩度爾鄂什希三地各設斤墩周圍防守牧廠俟入冬過山悉撤之一哈密等處既分駐兵丁西北一帶並應設斤墩瞭望四遠乃有備無患按南山大

坂為哈密北面屏藩應於駐兵中撥二百人分
駐南山大坂盤道上小堡於鹿心山松樹塘烏
蘭特爾木斯畢留大坂等四處各設斥堠撥兵
瞭望烏克克嶺為三堡沙棗泉要隘應於駐兵
中撥二百人駐烏克克嶺上小堡於索大坂白
楊溝羊布納錫喇淖爾等三處各設斥堠撥兵
瞭望塔勒納沁河源為塔勒納沁要口應於駐
兵中撥二百人駐河源小堡於莫艾舒魯遜大

坂等二處各設斥堠撥兵瞭望一大兵撤後哈密貯糧充足且有賽巴什達里雅屯種田畝可供三處兵丁口糧無庸輓運一留駐巴里坤兵丁塞外勤勞已閱七載邊界定議後應悉撤還現在安西鎮標及瓜州兵凡七千餘除駐防哈密一千外存營者尚六千餘人請豫選安西兵四千俟巴里坤兵撤還時即令大員統領赴哈密駐防以均勞逸辦理軍機大臣等議覆悉如

所請奏入

上從之

己丑

議西路駐防事宜

署寧遠大將軍查郎阿等奏西路駐防事宜一
已里坤兵丁撤時廷議於安西等處增設一提
一鎮兵萬人令各攜家口赴所在駐劄彈壓邊
陲聲援哈密竊計增兵萬人需糧十萬安西屯

田不過三千餘石口糧恐不敷給況兵丁家口
移動廩費更多城堡營房事事更須籌畫不若
更番迭戍既可省費亦且經久請即於肅鎮甘
提涼鎮西寧鎮安西鎮各撥兵一千合五千人
赴哈密駐防其安西所在不必增設提鎮兵丁
一請於陝西督標撥兵一千固原提標及各協
屬撥兵一千五百延綏撥兵一千寧夏撥兵一
千河州撥兵五百凡五千人在赤金靖逆柳溝

布隆吉爾橋灣五處駐防所在附近並有牧場
可以牧放馬駝一赤金靖逆等五處兵丁期以
二年悉令更代其哈密兵丁每年更代一半其
半嫺熟即可教習一半新兵一哈密及赤金等
處各有五千兵丁駐防其統領者應以總兵二
員副將二員率遊擊守備千總把總等分轄駐
防赤金等處總兵副將於兵丁更代時俱代駐
防哈密總兵副將令其一年更代庶屯田斥堠

諸務有新舊大員相間管領事事熟練一軍營
應支口糧駐防哈密兵屯種收穫儘足供給其
駐防安西兵五千加以率兵將弁歲需口糧一
萬五千餘石其各衛所官屯地畝應悉付與安
西鎮標營兵丁令其屯種以為恒產即以所獲
籽粒供兵丁口糧如尚不足折銀給予如例一
肅鎮為臨邊重地請增城守一營設都司一員
千總一員把總二員於標營兵中撥步兵二百

專司城守汛防之事按肅州鎮標合新舊兵凡
二千九百餘應增足三千之數以新募守兵即
撥入城守營辦理軍機大臣等議覆悉應如所
請但哈密及赤金等處駐防兵丁雖各有總兵
官統領大兵甫撤兩總兵官分駐兩地更需總
統大臣一人彈壓請再令提督一員駐劄哈密
節制兩處居中調度尤便奏入

上從之

壬辰

命安插肅州所在貧民流寓傭作者

署陝西總督劉於義奏言肅州自軍興以來輓
運糧車及刈草夫役並陝甘所在無業貧民流
寓傭作度日不下萬人現今大兵盡撤無業窮
民無所事事難以自給日則散行市廛夜則棲
宿古廟日復一日恐至流入匪類應請令沿途
有司給予口糧遣佐雜千把等遞送回籍安插

辦理軍機大臣等議覆應如所請奏入

上從之

甲午

命復寧夏鎮五營之制及改設城守營都司

署陝西總督劉於義奏言寧夏鎮城地處極邊
鎮標舊設中左右前後五營官兵以資彈壓雍
正五年新設大通一鎮始裁後營官兵撥赴大
通止留中左右前四營今請仍設五營以成營

制再寧夏府城舊設城守營都司一員把總二員專司門禁自康熙四十七年設寧夏審事官二員汰去都司止留把總二員歸中軍遊擊兼轄但城守乃金湯重任亦需大員專司請以大壩堡都司改為寧夏城守營都司統轄把總二員其大壩堡增設千總一員歸玉泉營遊擊管轄兵部議覆並應如所請奏入

上從之

丁酉

命設得卜特爾伊克柴達木等卡倫選兵更番駐防
總理青海番子事務德齡等奏言哈爾垓圖駐
劄西寧大通綠旗兵二千現今遵

旨撤還但噶斯一路設卡偵息防護青海蒙古游牧最
要應撥青海扎薩克兵二千以備策應即隊中
選精兵二百並選綠旗兵百人遣官統領赴得
卜特爾伊克柴達木等要害處並設臺站卡倫

每年更代以資防護辦理軍機大臣等議覆如
所請奏入

上從之尋德齡又奏言

欽差大臣伊禮布等已率西寧大通二處綠旗兵丁各
還汛地并繳

欽差大臣關防一顆奏入報

聞

定邊大將軍平郡王福彭奏報北路軍營撤兵

事宜

福彭奏言北路撤兵事宜京城滿洲大營兵令
叅贊前鋒統領阿岱都統扣婁副都統阿那布
副都統職銜紀山率之滿洲防戍兵令內大臣
都統查克旦率之奉天兵令副都統額爾勤副
都統白爾赫圖率之吉林兵令副都統哲庫訥
率之齊齊哈爾兵令副都統職銜和托克副都
統布爾沙副都統職銜班圖率之右衛兵令都



統王常率之內扎薩克蒙古兵令科爾沁王羅卜藏喇什喀喇沁貝勒僧袞扎卜敖漢貝子羅卜藏等率之歸化城土默特兵令營總烏巴什等率之給予馬匹口糧各分隊伍於六月初三日至二十日陸續啟行科爾沁額駙達爾瑪達都台吉袞濟扎卜亦令其起程四省綠旗兵俟總兵官李如栢率新兵到營更換後令總兵官胡傑等率之各還營汛奏入報

聞

七月壬寅

命沙州採買糧石貯用

署陝西總督劉於義等奏言沙州厯年採買糧石今年正屆收穫之期現今哈密橋灣布隆吉爾截留軍糧雖多而沙州無現糧收貯應仍採買各色糧一萬石貯用辦理軍機大臣等議覆應如所請奏入

上從之

癸卯

命馬蘭泰回京

上諭辦理軍機大臣等曰據軍前副都統宗室諾穆柱倭星額叅奏侯馬蘭泰著傳諭大將軍平郡王令馬蘭泰回京朕有詢問之處

命署理領侍衛內大臣伯伊勒慎正黃旗滿洲副都統覺羅蘇爾泰並赴北路軍營管轄兵丁

辛亥

命侍郎雙喜留駐烏里雅蘇台辦理糧餉事務尚書性
桂辦理鄂爾昆糧餉事務學士富德協辦鄂爾
昆糧餉並隨大將軍印務

甲寅

命免觀音保阿克山等罪赴北路軍營効力

署寧遠大將軍查郎阿奏言革職荊州副都統
觀音保江寧副都統阿克山久經枷號軍營今

大兵已撤應否解京送刑部監候革職寧夏將
軍卓鼐寧夏副都統僧保西安布政使諾穆琿
俱在軍營當苦差効力贖罪令大兵撤回卓鼐
等應令回旗無庸仍留軍營恭候

欽定奏入得

旨觀音保阿克山從寬釋放與卓鼐僧保諾穆琿俱著
自備鞍馬前赴北路軍營交大將軍平郡王令其効
力贖罪

丁巳

命給價收贖蒙古典賣人口各還所部其不願還者酌量安插

上諭辦理軍機大臣等曰朕軫念鄂爾多斯貧乏蒙古有就食口內典賣妻子人口者前已降旨令該地方官查明賞給原價贖出照看安插今據史貽直等奏稱查出雍正十二三年邊民并延綏鎮及各將弁共買蒙古子女二千四百餘口其雍正十一年以前尚

有邊民娶買乞養者今亦查出先將上年今年凡有
典買蒙古人口細查贖回應否俱發夷漢衙門查明
親屬轉交完聚之處相應請旨再米國正身為鎮臣
首先倡買五名以致該將弁軍民人等效尤共買二
十七口臣等不敢隱徇等語蒙古乏食貧民典賣子
女其已經查贖人口朕另降旨詢問該扎薩克等情
願領回者令其領回完聚倘有不願領回者再行商
酌安插之法其未經查報人口務須清查辦理至米

國正及將弁等因蒙古乏食用價收買俾得存養與尋常典買蒙古人口有間著將所買人口交出不必叅處其雍正十一年以前邊民娶買乞養人口亦降旨詢問該扎薩克等有情願領回者賞給原價贖回其中若有歷年既久居處相安不願領回者即聽其存留免其查究嗣後該地方官務須嚴禁邊民不得娶買乞養蒙古人口倘有故違定例私自典買者一經查出從重治罪並將該地方官一併嚴加議處

署寧遠大將軍查郎阿等奏報準噶爾使臣吹
納木喀起程還部

查郎阿等奏言吹納木喀等於六月二十日至
軍臣等給以馬駝米麪茶羊等物令副都統班
第率官兵三百自軍營護送啟行已于六月二
十七日出科舍圖卡倫西去奏入報

聞

己未

命免南稱族番民補交本年貢馬價值

上諭辦理軍機大臣等曰南稱族番民固魯旺舒克等
來納貢馬被郭羅克賊番劫奪現在嚴拿究擬至固
魯旺舒克等據德齡等奏稱已給路費送回番民復
願將馬價另行補交等語朕念該番補交馬價未免
勞費著將今年貢馬免其交納

庚申

命加恩以甘肅本年先完地丁錢糧准作來年正賦

上諭辦理軍機大臣等曰西陲用兵以來甘肅等處民人急公効力甚屬可嘉是以朕屢沛恩膏免其正賦今年又將地丁錢糧全行蠲免所以優恤民力令其寬裕也今據巡撫許容奏稱五月接奉諭旨之時已據各屬詳報完納銀一十二萬餘兩查定例已完者充餉未完者免徵此項應照例充餉等語朕因嘉獎秦民奉公趨事是以特加格外之恩而其中爭先完課者尤為良善之民著將已完若干准其作來年正

賦許容可傳旨速諭俾聞咸知朕意並督率有司實力奉行毋使胥吏土棍作弊中飽

命陝甘等省千總把總自軍營撤還者仍留本省用并出本省俸淺未出兵各弁員缺令其即補

上諭辦理軍機大臣等曰朕軫念行間將士從前曾降諭旨令將陝西等省現出各缺於十缺之中分出三缺以陞補出征弁員數年以來隨征將弁各按出力等次俱得遞行擢用現今西路官兵次第撤回凡弁

員之陞補他省者俱應各赴新任今據署大將軍查
郎阿等奏稱將弁中有陝甘人員陞補直隸山西
東河南四川五省之千把伊等隨征年久俱從兵丁
拔補今甫回本籍又遠赴新任或有無力攜帶家屬
者若隻身遠去則家中又恐無人養贍可否將現在
西路軍營之陝甘人員內陞補直隸等五省之千把
仍留在陝甘各營食俸辦事遇缺挨補等語查郎阿
等奏請之處甚是但伊等効力有年撤回之後留於

本省候缺未免多需時日尚未允協著陝甘督撫提鎮將現任各千把之未經出征者分別查明如內有食俸年淺及未曾出力之人令其出缺候補其所出之缺即將軍營撤回之留陝千把悉行補用至該千把等既留陝甘補用則所遺直隸等五省員缺應行拔補查直隸等五省亦有自軍營撤回應補千把之人著該督撫等即將伊等補授此缺倘撤回各弁人多缺少亦照陝省將俸淺未經出征之千把內暫行

出缺補用伊等以示朕體恤從征弁員之至意

乙丑

命議叙署寧遠大將軍查郎阿等功

上諭辦理軍機大臣等曰西路官兵前因岳鍾琪調度失宜諸事廢弛遂致軍氣不揚士心不振自雍正十年查郎阿統兵以來與張廣泗同心協力事事整頓時時訓練凡行間將士俱知奮勇効力營伍為之改觀所以十一年及十二年賊人兩次侵犯卡倫俱為

我兵擒勦未令免脫賊人因我軍嚴整畏憚懾伏從前狡獪伎倆不敢復逞此皆由查郎阿等辦理妥協之所致令大兵撤回查郎阿張廣泗俱著交部從優議叙再自雍正十年以後調往西路之奉天吉林索倫及蒙古官兵皆為奮勉其中之勞績懋著上等出力者亦宜加恩獎勵著查郎阿查明據實具奏一併交部議叙其未經著有勞績及岳鍾琪任內行走之人不必開入

丙寅

定邊大將軍平郡王福彭奏報大軍至鄂爾昆
福彭奏言臣等於六月二十六日率官兵自烏
里雅蘇台啟行七月十二日至鄂爾昆全軍先
後悉至謹擇二十日於鄂爾昆河額爾得尼招
迤北興工建城奏入報

聞

八月戊辰

命撤西路臺站設馬塘於馬蓮井子等處

署寧遠大將軍查郎阿等奏言巴里坤既撤兵
西北兩路無庸更相傳報應於官兵啟行時悉
撤柰曼等處及西路口外臺站惟哈密橋灣等
處尚有兵駐防往來遞送文檄請於馬蓮井子
以東星星峽以西各撥兵設馬塘每塘給馬六
匹以供馳送辦理軍機大臣等議覆應如所請
奏入

上從之

癸未

命直隸山西陝西等省自軍前撤還外委各員於本營

即予補用

上諭兵部曰朕軫念出征弁員已降旨將軍營撤回千把人員即得缺補用以獎勤勞今思軍營兵丁中有奮勇戎行出衆効力或臨陣對敵得受恩賞大將軍曾給以外委委牌者此等人回營之後亦應即為補

用著該管大臣將伊等効力之處查核明確並考驗其技勇若現有外委之缺即令頂補如缺少人多即將現在外委人員內未曾出力而技藝生疎者令其出缺以軍前之外委頂補可傳諭直隸山陝等數省一體遵行

丙戌

命蒙古牧放馬駝倒斃酌予定數免賠其不及數者賞

賜加獎

上諭辦理軍機大臣等曰北路軍營駝馬牲畜交與蒙古收放聞未定倒斃數目以數萬牲畜經年收放即倍加謹慎難保無一倒斃乃悉令蒙古賠補殊為可憫自軍興以來喀爾喀蒙古等甚屬効力今特沛恩施嗣後交與伊等之牲畜一年於一百匹內倒斃六匹以下者免其賠補如倒斃不至定數酌量賞賜以示鼓勵著行文大將軍平郡王等曉諭衆蒙古知之平定準噶爾方略前編卷三十八